

24/06/1998

Esei Dr M dijadikan buku

Azizi Othman in London

LONDON, Selasa - Lima esei karangan Datuk Seri Dr Mahathir Mohamad, akan diterbitkan sebagai sebuah buku oleh Weidenfeld & Nicolson, bertajuk The Way Forward, di sini bulan depan.

Weidenfeld & Nicholson, dalam kenyataannya hari ini berkata, buku setebal 133 halaman itu akan dilancarkan oleh bekas Perdana Menteri Britain, Baroness Margaret Thatcher, pada 7 Julai ini.

Menurutnya, buku itu yang akan dijual pada harga STG16.00 paun senaskhah mula diedarkan di kedai buku terkemuka di Britain, Malaysia dan Singapura sehari selepas dilancarkan.

Antara lain, kandungan kumpulan esei The Way Forward mengetengahkan diskusi Perdana Menteri berhubung kejayaan dan kegagalan beberapa dasar kerajaan sejak Malaysia merdeka pada 31 Ogos 1957.

Secara khusus, lima esei itu membincangkan bagaimana Dasar Ekonomi Baru (DEB) dan Dasar Pembangunan Nasional (DPN) dirumuskan dalam usaha Malaysia menangani masalah utama pengagihan kekayaan negara.

Lima esei yang dijadikan buku The Way Forward itu juga mengenai langkah kerajaan untuk membawa kaum Bumiputera turut serta dalam arus perdana ekonomi Malaysia.

Weidenfeld & Nicolson berkata, The Way Forward akan menjadi bahan kajian utama menyangkal dakwaan kononnya Malaysia tidak akan stabil apatah lagi makmur selepas mencapai kemerdekaan 41 tahun lalu.

(END)